

AKASHVANI AIZAWL

REGIONAL NEWS BULLETIN

HEADLINES (MORNING)

1. Aizawl Municipal Corporation (AMC) inthlan lo awm tura candidate te inhnudawh hun, nimin thleng khan candidate inhnukdawk an awm lo a, Independent candidate an awm lo bawk.
2. Lunglei District chhunga national highway (NH) kawngpui zauh leh siam that hna kal mek dinhmun leh fur hmaa hna thawh tur hmachhawpte thawh zawh dan tur Bawrsap hoin thlir ho a ni.
3. Thlaleh April ni 21-a Aizawl Municipal Corporation inthlan lo awm tur atan Political Party hrang hrangte'n vote zawn an ngawrh chho hle
4. Congressman Tom Suozzi chu Congressional Caucus on India leh Indian Americans te tangkawp Democratic Vice-Chair atan ruat a ni.

<><><>

AMC ELECTION OFFICIALS' PREPARATION

Thla thar ni 21-a Aizawl Municipal Corporation (AMC) inthlan lo awm tura candidate te inhnudawh hun, nimin thleng khan candidate inhnukdawk an awm lo a, Independent candidate an awm lo bawk.

Nimin khan Aizawl District Election Officer leh District Municipal Election Officer ni bawk Pu Lalhriatpuia kaihhruaiin AMC, 2026 General Election inpuahchah dan thlirho a ni a. He thutkhawmah hian Municipal Returning Officer, Assistant Municipal Returning Officer leh Nodal Officer te an tel a. Official tin ten an mawhphurhna zawn theuhva an hmalak tawhna leh hmachhawp awm te report an pe a. AMC, 2026 General Election-ah hian ZPM, MNF leh Congress party te chuan Ward 19-ah candidate an nei vek a. BJP in Ward 11-ah candidate an nei thung a, Independent Candidate an awm lo a ni. Candidate te hi an vaiin 68 an ni a. Hmeichhia- 27 leh mipa- 41 an awm a. Ward paruk - Ward II,IV,V,XI,XII leh XVII te chu hmeichhe tana reserved ward an ni.

Tun tum AMC, 2026 General Election a hman tur Final Electoral Rolls a voter awm zat chu mi nuai 2 sing 3 sang 9, 989 niin, hmeichhia – nuai 1 sing 2 sang 9, 656 leh Mipa – nuai 1 sing 1, zathum sawmthum pathum an ni a. Mipa aiin hmeichhia 19,323 in an tam a. Voter tamna ber Ward chu WARD XVIII niin, voter 18,906 an awm a. A tlemna ber Ward hi WARD VIII niin; voters 7,975 an awm thung a ni.

(DIPR)

<><><>

NH-54 & NH-302

Lunglei District chhunga national highway (NH) kawngpui zauh leh siam that hna kal mek dinhmun leh fur hmaa hna thawh tur hmachhawpte Lunglei Bawrsap Pi Navneet Mann hoin nimin khan a pisaah sawiho a ni.

He thutkhawmah hian Revenue Branch official-te, National Highways & Infrastructure Development Corporation Ltd (NHIDCL) leh BRN Infrastructures Pvt Ltd ai awhte leh Lunglei Sub-Headquarters YMA hruaitute an tel a. Bawrsap chuan NH-54 leh NH-302 kawngpui siam that hna kal mekah chak zawka hna thawh a nih theih nan NHIDCL leh contractor-te chu an nawr reng thu a sawi a. Hetihrual hian harsatna hrang hrang avanga duh anga hna thawh chak theih loh te, khuarel thil avanga hna khaihlahk te a awm thin tih a sawi a. Fur a lo thlen leh mai dawn avangin hna thawh tur ngaih pawimawh hmasakte fur hmaa thawh turin ruahmanna siam a nih thu a sawi.

Assistant Commissioner (Revenue) Pi Jennifer Vanlalhruii Pachuau chuan Lunglei District chhunga NH-54 leh NH-302 kawngpui siam hna kal mek dinhmun tlangpui a tarlang a. NH-302 chu kilometre 95 chuang hreta thui niin, package 2-ah then a nih thu a sawi a. KM 52-a thui Package A (Hrangchalkawn atanga Phairuankai)-ah hna zaa 65.98 thawh zawh tawh niin, KM 43 chuang hreta thui Package B (Chhumkhum atanga Tlabung)-ah hna zaa 63.14 thawh zawh tawh a nih thu a sawi a. NH-54-ah Package 3, 4, 5 leh Package 6 thenkhat, a zavaiin KM 147.211-a thui (Bungtlang-Thingfal) chu Lunglei District enkawlna hnuaiawm niin, hna zaa 97 thawh zawh a nih tawh thu a sawi a ni.

Thutkhawmah hian hna thawktu BRNIPL te chuan Work Plan zulzuia an hna thawh dinhmun leh hmabak an neih dan te, fur hmaa hna an thawh theih tur chin te report-in, Sub-Headquarters YMA hruaitute chuan an ngaih pawimawh hrang hrangte an sawi bawk a ni.

(DIPR)



AMC

Thlaleh April ni 21-a Aizawl Municipal Corporation inthlan lo awm tur atan Political Party hrang hrangte'n vote zawn an ngawrh chho hle a,

ZPM leader, Chief Minister Pu Lalduhoma chuan, MNF AMC-te khan Aizawl an lo vei lo hle a ti a, AMC hnuai ULB Grant tur chu Kum 2024-25 khan cheng nuai 2,976 an nawrchhuak a. Hei hi AMC-ten an ngawih bopui a, March ni 18 khan an hrechhuak chauh a, a lapse loh nan cheng nuai 2,876.88 an haichhuak leh hman a, Nikum hmasaa mi an haichhuak a, tuna mite kutah a lut a, tunah an hmang thei dawn ta chauh a ni a ti. Pu Lalduhoma chuan, kum 2025-26 Grant nawrchhuah leh a ngai a, cheng nuai 3053 lapse tur a awm a, tun ni hnih lek la awm chhung hian nawrchhuahkan tum leh mek a, ngaihsak loh avanga hetiang a liam ringawt tur chu a pawu an ti tih sawiin, an ui a, theihtawp an chhuah mek a ti a ni.

AMC Sports Complex, Bawngkawn chungchangah mi 16 hnena hna inpek chungchang bakah JCB nei reng chunga mimal JCB hawha Tuirial bawlhhlawh paihna siam a ni te leh SIPMIU-in a thlawna AMC hnenah tipper 50 leh pik up 4 Cheng nuai 24 chuanga an neih kha cheng nuai 5 awrhin an hralh duh leh mai te chu thil diklo tamtak awm niin a lang a ti a, Mizoram khawpui berah kalphung hlui kaihhruai sorkar AMC a thildiklo te siamthat a hun a ni a ti.

Chief Minister chuan tuna an sorkar leibat zat chu SASCI avangtein a lang tam lo thei lova, a lan tam chu an duh zawk tih a sawi bawk a ni.

MNF President Pu Zoramthanga chuan nimin khan Mizo Hnam Run-a an party chhung inkhawmah AMC inthlan lo awm tur atana an party Manifesto a tlangzarh a, MNF Manifesto-ah hian Aizawl khawpui chuan kum 136 a tling a, Zofate Jerusalem a nih angin khawpui nuam, fai leh thianghlim, hmasawn leh zual ni tura theihtawpa thaa enkawl chu MNF party chuan tul a tiin a ngai pawimawh hle tih tarlangin AMC election 2026-ah hian MNF party in Pathian leh mipuite zara sorkarna a siam chhonzawm leh a nih chuan Aizawl khawpui enkawl tura hmalak an tum dan pawimawh zualte an tarlang a ni.

He hunah hian MNF Sr. Vice President Dr. R. Lalthangliana chuan thusawiin, Assembly House-a a thut leh hnuah Chief Minister Pu Lalduhoma'n January ni 17-a Prime Minister Narendra Modi hnena Aizawl khawpui chu a tawt tawh em avangin Thenzawl a sawn tura ngenna lehkha a thawn chu a document ngei pek ve a nih thu a sawi a, Aizawl khawpui Thenzawla sawn tur atana DPR siamna tur cheng vbc 10 chuang an dil pawh Aizawl mipuite beng a thlen tak tak chuan Khawpui (Capital) ni lovin Peace City din tumna niin Chief Minister chuan a sawi leh daih a ti a. MNF chuan Aizawl khawpui chu khawpui a nihna angin cheina tur tam tak a la awm avangin AMC inthlan lo awm turah MNF-in sorkarna a chang leh a nih chuan Aizawl khawpui chei tha turin hma an la dawn tih a sawi a, mipuite chu MNF vote turin a sawm a ni.

MPCC Sr. Vice President Pu Lalnunmawia Chuaungo chuan nimina Congress Bhavan-a an party Political Session-ah thusawiin, ram rorelna fawng chelh leh turin Congress chu an inbuatsaih mek a ti a. Hemi an inbuatsaihna kawnga pawimawh em em AMC inthlan a awm dawn a ti a, Mizoram chuan a hun taka AMC inthlan neih pui ngam lo ZPM kaihhruai sorkar an hrawn mek tih sawiin, AMC term a tawp hnuah direct-a AMC an thununna hnuai a awm hun an nghak phawt a ti a, hei bakah hian sorkar tawh zawng zawngin an lo tih thin tho, mipui sum tling khawm hmanga Aizawl khawpui kawng siamthat nial nual avanga mipuite rilru suk nem an tum niin a lang a ti a. Hetihruah hian an hmalakna chuan kawngro a su vak dawn lo niin a lang a ti a. Aizawl khawpui leh AMC enkawl turin Congress candidate te chu an tha tawk a, vote turin mipuite a sawm a ni.

Akashvani News Aizawl zawhna chhangin, BJP Mizoram President Dr.K. Beichhua chuan AMC inthlan lo awm turah hian an party chuan khawtlang leh ram tana ngaihtuahna hmang thintu candidate fel tak tak mi 11 an neih te chu an chhuang hle a ti a. Party dang candidate te pawh tha tak tak ni mah se, wawiina Mizoram dinhmun enin eng party-in nge hmasawna ruhrel tipuitling thei tih ngaihtuah chungin Central-a sorkarna chang mek BJP vote turin mipuite a sawm a, BJP kaihhruai sorkar thil tih tawh chinah tu mai pawhin Prime Minister Pu Modi-a hmalakna that zia an hmuh angin AMC-a BJP candidate te pawhin an thil tum chu Viksit Bharat leh Viksit Mizoram a ni tih sawiin, AMC-ah hian sorkarna an lak chuan Aizawl hmasawna chu an thupui ber a nih tur thu a sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

TOM SOUZZI FOR INDIAN AMERICANS

Congressman Tom Suozzi chu Congressional Caucus on India leh Indian Americans te tangkawp Democratic Vice-Chair atan ruat a ni. Suozzi-a'n Indian American community nena hun rei tak an thawhho tawhna leh Washington leh New Delhi inkara inzawmna tihchakna kawnga a hnathawh that vang te niin Caucus Chairman Ro Khanna chuan a sawi a ni.

Suozzi a hnathawh tawh zingah hian India ram a tlawh bakah, nikum khan American Member of Congress zinga Kartarpur Corridor tlawh hmasa ber a ni a. Long Island leh Queens huam chhunga Indian American mipui tamna district aiawhtu a ni bawh niin thuthar thehdarhtute chuan a tarlang.

Suozzi chuan Congressional Caucus on India leh Indian Americans-a Vice-Chair atana thlan a nih chu chawimawina a nih thu a sawi a. A district-ah hian Indian American tamtham tak an awm a, hun rei tak chhung an thawhona leh an inhmelhriatna pawh a chhuan thu a sawi a ni.

News On Air

<><><>